

Gou Yaek Gyahaeuj Cunghgoz Gungcanjdangj

我要加入中国共产党

□ Veiz Haijlanz / 韦海兰

“Lauxsae, gou yaek gyahaeuj Cunghgoz Gungcanjdangj!” Neix dwg diuz saenqsik dah hagseng ngamq bizyez mbouj geij nanz haenx fat hawj gou. Yawj daengz diuz saenqsik neix le, gou ndawsim roxninh soengset lo, dah neix cingqcaen majhung lo!

Dah neix dwg Siujdoengz. Sam bi gaxgonq, Siujdoengz daj gizgyae daeuj daengz aen hagdangz dou, faen haeuj aen ban gou. Haihag ngamq singhiz lai, miz haemh ndeu gou bae caz suzse, byaij gvaq suzse Siujdoengz seiz, yawjraen bouxguenjsuzse hix youq ndawde, cingq caeuq Siujdoengz gangj maz, hoeng gou daengz le gyoengqde couh mbouj caiq gangj lo. Gou cam bouxguenjsuzse miz maz saeh, de cix gangj mbouj miz maz la, gaenq gaijgez lo. Gvaqlaeng bouxguenjsuzse cij naeuz gou nyi, dwg Siujdoengz youq suzse citien, deng de gaebdawz, mboujgvaq Siujdoengz nyinhloek gig vaiq, caiq dwg baez daih’it famh saeh, ndigah bouxguenjsuzse hawj Siujdoengz baez gihvei gaij loek ndeu, couh mbouj dangqnaq de naeuz gou nyi gienh saeh neix.

Rox yienghneix le, gou couh cang baenz mbouj rox gienh saeh neix, doeklaeng cix lai haeujsim de. Daj denva hawj bohme de cam gij cingzvang gaxgonq de, ndaej rox de doeg cuhcungh seiz couh caeuq gyoengq doengzhag hag citien, lij caeuq bohme doxdingj, bohme gangj maz mbouj hab’eiq couh deuz okrog bae mbouj maranz.

Gou lij ndaej rox de haengj ciengq go, ciengq ndaej mbouj loek, ndigah gou hawj de dang vwnzyi vejyenz ndaw ban, de hix doengzeiq lo. Mbouj geij nanz, gou youq ndaw ban hai aen banhoih “Gyo’mbaiq Aencingz Bohme”, iu mbanj gyah-

cangj daeuj camgya. Gyoengq doengzhag ranz gyae gyahcangj daeuj mbouj ndaej, couh hawj gyahcangj fat vahdaengq loegyaem roxnaeuz fat saenqsik daeuj hawj gou. Daengz seiz haihoih, gou couh ingjboq gij siengq seiziq gyoengq hagseng, boq gij loegyaem gyahcangj roxnaeuz doeg gij saenqsik gyahcangj hawj hagseng dingq. Doenghij neix gyoengq hagseng cungj gig ngeix mbouj daengz, ndigah gyoengqde gamjdoengh raixcaix, haujlai hagseng cungj lae raemxda daejfwtfwt. Seizhaenx Siujdoengz ndwn youq dangqnaq caezgya, daejsaekkw gangj gij saeh swheij youq cuhcungh baenzlawz mbouj dingqgangj, de roxninh swheij mbouj roxsoq, hawj bohme siengsim lai lo……

Daj seizhaenx hwnj, gou roxninh Siujdoengz roxsoq lai lo, guh saeh haemq gaenx, cingzick hix yied ndaej yied ndei. Gou hix ciengzseiz gangj gij saeh Siujdoengz hawj bohme de nyi, caezsim son’gyauq de.

Aen yozgiz daihngaih miz haemh ndeu, gou ra Siujdoengz damzsim, gangj yaep ndeu le, de gag haibak naeuz gou nyi: “Lauxsae ha, mwh ngamq daeuj hagdangz raeuz seiz, gou dwg dajsuenq lujlaj myonx gvaq song sam bi, hoeng dingq lauxsae gangj haujlai dauhleix, hix yawj haujlai saw le, gij siengjap gou bienq lo, gou yaek haenqrengz gauj hwnj daihhag!” Gou dingq le, roxninh de gangj ndaej gig nyinhcaen, mbouj dwg gangjriu ndwi, couh caiq caeuq de gangj ngoenzlaeng baenzlawz bae hag, de dingq ndaej gig haeujsim.


Bi ndeu song bi, ndwenngoenz gvaq ndaej gig vaiq, Siujdoengz haeuj hag gaenq song bi lai. Yienznaeuz de mbanj baez hix guhloek, hoeng de gaenq dwg boux hagseng gig maenh-

ak ndeu, cingzick baujciz ndaw ban daihcib mingz gaxgonq, dwg ndaw hag “Cib Daih Gohsouj” “Daihuengz Danz Ganghgmiz” “Daihuengz Gangjgoj” daengjdaengj. Miz maz doxdax de cungj gaenxmaenx camgya. Mwhhaenx ndaw hag banh aen doxdax “Cuengq Sing Doeg Sawcuengh”, Siujdoengz yienznaeuz mbouj rox gangj Vahcuengh, hoeng de hix bauqmingz camgya. Aenvih ndaw ban miz seiq boux hagseng bauqmingz, hoeng aen ban cij ndaej hawj song boux camgya, Siujdoengz youh mbouj rox gangj Vahcuengh, ndigah gou mbouj daiq yawjnaek de geijlai, son sam boux wng gonq. Byawz rox Siujdoengz haeujsim raixcaix, de haethaemh cungj heuh boux doenghag rox gangj Vahcuengh daeuj son de doeg, rox doeg di le caiq daeuj doeg hawj gou dingq. Gou baez dingq le, raen gig ndei, engq haeujsim son de lo. Siujdoengz haengj hag gaenx lienh, cinbu gig vaiq, doeklaeng camgya aen

doxdax neix ndaej mingz daihngaih. Yaek senj hagseng bae ndaw gih camgya doxdax seiz, gou gietdingh senj de camgya. Aenvih de haengj hag youh buekguh, hawj gou gig miz saenqsim. Dahraix, de mbouj hawj gou saetnaj, aeu ndaej ndaw gih doxdax it daengjciengj.

Siujdoengz doiq swheij ngoenz beij ngoenz miz saenqsim lo. Doeklaeng aen haggeiz, de gietdingh aeu gauj hwnj aenhag bwnjgoh. De gangj daengz guh daengz, engqgya haeujsim gaenx hag gaenx lienh, buek hag song ndwen lai, de swnhleih gauj hwnj aenhag bwnjgoh……

Seizneix, Siujdoengz haeuj daih-hag ngamq ndaej ndwen lai, diuz saenqsik hainduj gou dwen de couh fat daeuj hawj gou lo. Siujdoengz, gou raen mwngz cingqcaen majhung lo! Muengh mwngz riengz diuz roen cingqcup neix byaij bae engq gyae, mbin ndaej engq sang!



“Ha! Bouxlaux mwngz dwg lauxhangz loengh duzngwz——?”

“Haengj ndwi!”

“Ai!”

Lungz Byauh doq vut diuz fiengz fwngz, dep Bouxfamhlaux di.

“Danghnaeuz gij baksieng mwngz baez hainduj couh aeu nywjlinxngwz、vagimngaenz caeuq hazbiz daem yungz oep dwk, couh mbouj deng naeuh baenz yienghneix lo.”

“Caen dwg lauxhangz, bouxlaux, mwngz nyienh sonson gou lwi?”

Bouxfamhlaux hai da nyenx de baez yawj, ngauzngauz gyaeuj.

Lungz Byauh gwq daeuh de, de cix gyaen hwnjdaeuj ninz ndaek lo.

Lungz Byauh mbouj doeknaiq, caj de ndiu lo, caiq daeuh, de vanzlij mbouj nyienh.

Ngoenz daihngaih, Lungz Byauh

•Sawcuenhraz Lwngnyez•

Gij Golwngnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

youh daeuh de.

Ngoenz daihsam, ngoenz daihseiq…… Lungz Byauh baez dem baez daeuh de son bonjfaenh hag di bonjsaeh loengh duzngwz caeuq rox di ywdoj, de cungj mbouj nyienh.

Aiq youh gvaq le ndwen ndeu, gyanghwnz, Lungz Byauh youq ndaw loq deng vunz gaex ndiu, ngamq yaek fanndang, sawqmwh henz rwz ndaejni

gij sing iqetet he:

“Daegmbauq, ai—— Ndiu yaep he.”

Lungz Byauh baez fanndang naengh hwnjdaeuj, yawjraen youq henz ndang miz aen ngauez he.

“Miz maz saeh?”

“Gyaeuj gou gig in, ai! Mwngz bang gou nyaenxnyaenx laenghoz gou.”

Dingq gij sing couh rox dwg

bouxfamhlaux haenx, Lungz Byauh iet fwngz baez lumh, daengx ndang de ndatfwdfwd, roxninh de cingq fatndat, gipmuengz hawj de ninz youq gwnz dongfiengz bonjfaenh, fan ndang de gvaqbae, biengj hwnj buh baihlaeng de, goz lwgfwngzyinx caeuq lwgfwngzgyang fwngzgva, roengzrengz giemz baihlaeng de.

(caengz sat)